

## Yech yilo kwaan mkee Pab lo Timoteo

<sup>1</sup> Dix Wech Timoteo.

Na nak Pab. Nak na tub xaa mxaal Dios, xaa nzaa yalnaban lo be, nu Jesucrist, xaa nkambaz be, zee kayaa na yalnabeyy cheen Jesucrist.

<sup>2</sup> Nkee na yech ne lo lu Timoteo. Wlipa na, lu nak mod xgaan na lo kwaan nak cheen Xaa Nabeyy. Nzhekla na luu Dios, xaa nak Xuz be, nu Jesucrist, Xaa Nabeyy be, re yalnkela cheen xaa lo lu, nu noka nzhekla na lesla xaa ne xaa lu, zee nix doo gak lextoo lu.

*Nzhaal nabeyy lu re maestr, zee nalut xaa kwaan nawent*

<sup>3</sup> Mod nguniila na lo lu gorna merla roo na yezh Éfeso zee ya na yizhyo Macedonia, blake baa, zee nabeyy lu re xaa kwaan nlu kwaan nawlit zee nalutra xaaya,

<sup>4</sup> zee nixa nawiitra re xaa lo re kwent gox, nixa lo re dii cheen xey xaa. Nel re kwaane nle zee ndildiizh xaa nu sbaa nangwiit xaa lo Jesucrist mod nak xgab cheen Dios. Sbaaka nzhaal le lu nal.

<sup>5</sup> Kwaan nii na nak: Kela be tub be stub be kwaan dub lextoo be, nu kwaan tub xgab nali nak, nel tira ngwii be lo Jesucrist.

<sup>6</sup> Nzho rol xaa nlaa kwaane nu nhake xaa tich stub naz wdizh kwaan nanont.

<sup>7</sup> Nzhekla xaa luu xaa ley cheen Dios, per nixa nanet xaa cho kwaan nzhéya, nu nixa nanewent xaa xomod nak re kwaan nzaa xaa kwent.

**8** Nela be lee ley nak kwaan wen, chelee xaa nlu  
xaaya mod nzhekla Dios.

**9** Nkin ne be kwaane, nik tub ley nangaazht tub  
kwaan tich re xaa nle kwaan wen, sinka lee ley  
naab kwent:

lo re xaa nanlet kwaan nzhé ley,  
lo re xaa nanzhont diizh,  
lo re xaa nangwiit lo Dios,  
lo re xaa kwaan nle jwalt,  
lo re xaa nanont Dios lo,  
lo re xaa nanzhebt ne Dios,  
lo re xaa nzhut xuz nu nzhut xnaa,  
lo re xaa nzhut myet,

**10** nu lo re xaa nchaal stub naz sa myet,  
lo re xaa nchaal leeka sa byi xaa,  
lo re xaa nlewann sa myet zee naab xaa demi,  
lo re xaa nkade,  
lo re xaa nchaw krus mbezh wliya nu nawlita,  
lo re xaa kwaan nanzaat yek gon kwaan wli.

**11** Nu lee ley naab kwent lo re xaa sbaa nle, mod  
nlu wdizh chul. Nu wdizh chul ne nak kwaan non  
doo, nu dixkix Dios, mxaal xaa na mza na kwent  
cheena.

### *Pab tubka nzaa dixkix lo Jesucrist*

**12** Tubka nza na dixkix lo Jesucrist, Xaa Nabeyy  
be, nel lee xaa mzaa yalnabeyy nu yalngezh lo na  
zee nkee na xchiin xaa, nel ne xaa lee na leya.

**13** Per yilo mle na kwaan nawent lo xaa: nzhé na  
nanont xaa, nu mrenal na re xaa xaa, nu mseweey  
na re xaa. Per mlesla Dios ne na nel zer labeyy na  
xaa, nu nanet na cho kwaan mle na.

**14** Nu lee Xaa Nabeyy be mle tub kwaan gro doo  
lo na, nel mlesdoola xaa ne xaa na, nu mle xaa

zee ngwii na lo Jesucrist, nu nkano na yalnkela nel tubka nzo na kwaan Jesucrist.

<sup>15</sup> “Lee Jesucrist myaad lo yizhyo ne mkiib jwalt cheen re myet.” Kwaane nak kwaan wli, nu rese xaa nzhaal gona. Nu na nak tub xaa mas mzebra jwalt lo re xaa.

<sup>16</sup> Kwaanzee mlesla Dios ne na, nu Jesucrist nlu axta parota nyela xaa ne xaa na, nu sbaa nlu Dios xomod nyela xaa ne xaa re myet, zee noka re xaa gon xtizh Dios zee nzho mod le xaa gan yalnaban kwaan tira.

<sup>17</sup> Nzhaal gool rese be lo Dios nu yé be wen doo nak xaa, nel lee xaa tubka nak rey, xaa tira nayeta, nu xaa nanlut, nel nebse lee xaa nak Dios. Sbaa nzhaal gaka nal nu tira. ¡See gaka!

<sup>18</sup> Timoteo, lu nak mod xgaan na nu nkedoola na lu. Kwaane nak kwaan nii na lo lu, wen ble xchiin Xaa Nabeyy mod soldad, xaa wen ndil. Kwaane nak mod nzhé re xaa leezha mzaa xaa kwent kwaan nzhé Dios lo xaa nu ngunii xaaya lo lu.

<sup>19</sup> Kwaanzee tubka blib lextoo lu wii lo Jesucrist nu tubka ble kwaan ne lu wen nak. Nzho rol xaa namlet kwaane zee tira nguyo xaa zee mlaa xaa Dios.

<sup>20</sup> Sbaa mle Himeneo nu Jant, xaa mza na lo Maxuu, zee seed xaa naniiwent xaa Dios.

## 2

### *Xomod nzhaal wdizhno xaa Dios*

<sup>1</sup> Timoteo, nzhaal yé lu lo re xaa Jesús zee tubka wdizhno xaa Dios, nu naab xaa lo Dios kwent cheen rese myet, nu zaa xaa dixkix lo Dios.

<sup>2</sup> Nzhaal naab xaa lo Dios zee le xaa yudar re rey nu lo re xaa nak zhiin, zee chul kwi re be, zee nzho mod gool be lo Dios nu zo be nali lo Dios nu lo re myet.

<sup>3</sup> Nel kwaane nak kwaan wen, kwaan nyula Dios, xaa mzaa yalnaban lo be.

<sup>4</sup> Nel Dios nzhekla rese myet ne cho nak kwaan wli, zee nzho mod zaa xaa yalnaban kwaan tira lo xaa.

<sup>5</sup> Nyentra stub Dios tubka Dios nzho, nu tubka xaa nii kwent cheen be lo Dios, xaa ne nak Jesucrist.

<sup>6</sup> Nel Jesucrist mzaa yalnaban cheen zee mchee xaa jwalt cheen rese myet, nu Dios mle kwaane mer mbizh kwaan mleey xaa axta yilo.

<sup>7</sup> Dios mleey na zee mkayaa yalnabey lo Jesucrist, zee za na kwent wli ne lo re xaa stub yezh zee nzho mod wii xaa lo Jesucrist. Wlipa na kwaan nii na, nankadet na.

<sup>8</sup> Lee re xaabyi, loka pa nzo xaa nzhaal wdizhno xaa Dios, nu lep xaa yaa xaa naz yiba. Nzhaal le xaaya tub mod nali, nayot xyan nu nixa dil lextoo xaa.

<sup>9</sup> Nu nzhekla na gak re ngwnaa ler, mod nzhaal gak meya; nu nagakt me ler kwaan non doo nu nixa nadexkwaat me yek me chul doo, kwaanzee le zee wii re xaabyi lo me. Nu naweet me or nixa perla, kwaan non doo.

<sup>10</sup> Lee kwaan nzhekla na nak, lee re ngwnaa, me wlipa nholl lo Dios, le me kwaan wen, kwaane nak kwaan mas chul lo me.

<sup>11</sup> Lee re ngwnaa nzhaal gon me diizh nu nseed me xtizh Dios, nu naniit me leen pa nkasa gu.

<sup>12</sup> Nu nii na nyent mod seed ngwnaa re xaabyi nu nixa nanabeyyt me lo re xaabyi, sinka nzhekla na naniit me leen pa nkasa gu nu nakeet me rezh.

<sup>13</sup> Nel Dan mdexkwaa Dios yilotlaka, gwluzh mdexkwaa xaa Ev.

<sup>14</sup> Naleet Dan mkiil Maxuu sinka Ev mkiil Maxuu, zee nambint me xtizh Dios, sbaa mle me kwaan nawent.

<sup>15</sup> Per lee ngwnaa naluxt leezha gal xinn me chelee me tubka ngwii me lo Jesucrist, nu kano me yalnkela lextoo me, nu nali zo me delant lo Dios, zee gak me mod nzhaal gak me.

### 3

#### *Snee gak re xaa nabeyy lo re xaa Jesús*

<sup>1</sup> Wlipa na kwaane, chelee tub xaa nzhekla gak xaa tub xaa gol, xaa nabeyy lo re xaa Jesús, kwaane nak tub kwaan wen doo.

<sup>2</sup> Kwaanzee lee xaa kwaan nabeyy lo re xaa Jesús nzhaal nali le xaa re kwaan zee nik tub xaa naniit lee xaa nle kwaan nawent, nzhaal gak xaa nali lo sa xaa, nzhaal gak xaa tub xaa nali lo rese kwaan, nzhaal wen nabeyy xaa lo kwerp cheen xaa, nu nzhaal le xaa kwaan nii xaa.

Nu noka nzhaal gak xaa tub xaa zaa garli kwaz stub naz xaa,  
nu nzhaal gak xaa tub xaa nzho mod zaa kwent xtizh Dios lo re myet.

<sup>3</sup> Nagakt xaa nguy,  
nixa nakwaant xaa dil,  
nzhaal gak xaa nadoo,  
nanzhaalt gak xaa tub xaa nzoblash demi.

<sup>4</sup> Nzhaal nabeyy xaa lo re xaa li xaa,

nu le xaa gon re xinn xaa xtizh xaa,  
nu wii xaa respet lo re myet.

<sup>5</sup> Nu chelee xaa nyent mod nabeyy xaa garli xaa,  
sbaaka nyent mod nabeyy xaa lo re xaa Jesús.

<sup>6</sup> Nyent mod gak xaa tub xaa pensa mzelo ng-  
wii lo Jesús, nel napa kato xaa yalxwa, zee naab  
Dios kwent lo xaa mod ngunaab xaaya kwent lo  
Maxuu.

<sup>7</sup> Noka nzhaal gak xaa tub xaa nzhedizh wen re  
xaa nangwiit lo Dios, zee natont xaa ne xaa re  
myet, zee nayiyot xaa lo Maxuu.

*Snee nzhaal gak re xaa nle yudar re xaa Jesús*

<sup>8</sup> Sneeka nzhaal gak re xaa nle yudar re xaa  
Jesús:

nzhaal wii myet respet lo xaa,  
nzhaal le xaa re kwaan nii xaa,  
nu nagakt xaa nguy,  
nixa nagakt xaa tub xaa nzoblazh demi.

<sup>9</sup> Nzhaal wii xaa lo Jesucrist mod mlu Dios lo be  
nu kwaan nak xgab cheen xaa tubka le xaa kwaan  
wen.

<sup>10</sup> Yilotlaka nkin zaa xaa tub zhiin lo xaa zee nen  
che wen le xaaya. Chelee xaa wen mle xaaya, zee  
nzhoo mod gak xaa tub xaa le yudar re xaa Jesús.

<sup>11</sup> Nu sneeka nzhaal gak re ngwnaa:  
nzhaal le me kwaan nali zee nyent cho né lee me  
kale kwaan nawent,  
nakwaant me diizh,  
nu noka nzhaal wen nabeyy me lo kwerp cheen  
me,  
nu nzhaal gak me nali lo re kwaan nle me.  
<sup>12</sup> Nu rese xaa nle yudar re xaa Jesús nzhaal gak  
snee:  
nzhaal gak xaa nali lo sa xaa,

nu wen nabeyy xaa lo re xinn xaa nu lo re xaa  
nzho li xaa.

<sup>13</sup> Sbaaka nzhaal gak re xaa nle yudar re xaa Jesús,  
nu snee wen nii re myet xaa, zee sbaa nzho mod  
zaa xaa kwent cheen Jesucrist kwaan dub lextoo  
xaa lo re myet, zee nzho mod wii re myet respet lo  
Jesucrist.

### *Kwaan chul kwaan nle be krer*

<sup>14</sup> Nzhekla na yal na mas lijer lo lu, per nal xaal  
na yech ne lo lu,

<sup>15</sup> zee chelee na gak na tras, nzhaal ne lu xomod  
le lu lo re xaa Jesús, re xaa nak xinn Dios, xaa  
tubka mban. Lee re xaa Jesús nak mod tub yiso  
kwaan nzen yoo zee gaka nye, nel nle xaa zee  
nacheet re myet re kwaan wli cheen Jesús.

<sup>16</sup> ¡Naro doo nak kwaan ngulaan, kwaan mlu  
Dios lo be, xaa ngwii lo Jesucrist! Zee snee mbezh  
be:

Jesucrist myaad ngok xaa myet lo yizhyo,  
nu lee Mbi Naban cheen Dios mlu nali nak xaa,  
nu ngune re mandad cheen Dios lo xaa.

Xaa dub lo yizhyo mbin kwent cheen xaa.

Zyen doo myet lo yizhyo mwii lo xaa.

Nu Dios mtexoob xaa naz yiba.

## 4

### *Re kwaan nawlit kwaan nlu re maestr*

<sup>1</sup> Per lee Mbi Naban cheen Dios né klar doo,  
nu nzhé: Lee re mbizh gwluzhtlaka nzho xaa laa  
Jesucrist. Nu gon xaa kwaan nlu re mbi mal nu  
sbaa reke xaa tich yalnkade cheen re mandad  
cheen Maxuu.

<sup>2</sup> Yo xaa kwaan nlu kwaan nawlit, xaa mbezh tub kwaan per nle xaa stub kwaan. Kwaanzee lee xgab cheen xaa nanlut cho kwaan nak kwaan wli.

<sup>3</sup> Re xaa ne mbezh nawent ka xaa ngwnaa, nu nixa nawent gaw xaa rese kwaan; per lee Dios mzaa rese kwaan zee gaw myeta. Rese be, xaa nak xaa Jesús, nlabeyy be kwaan wli, zee nebse nzhaal zaa be dixkix lo Dios, zeera nzho mod gaw beya.

<sup>4</sup> Nel rese kwaan mdexkwaa Dios wen nak, nu rese kwaan mzaa Dios lo be, nanzhaalt yé be nawent naka, nebse nzhaal zaa be dixkix lo Dios nu kayaa beya.

<sup>5</sup> Nel Dios ngune wen nak rese kwaan mdexkwaa xaa nu leezha wdizhno be Dios, nzho mod kayaa beya mod tub kwaan nzhul.

### *Tub xmos Jesucrist nzhaal gak nali doo*

<sup>6</sup> Chelee lu seed lu re xaa Jesús kwaane, zeesi gak lu tub mos wen doo cheen Jesucrist. Nel ngok nye lu lo Dios kwent cheen xomod ngwii lu lo Jesucrist nu kwent cheen re kwaan wli kwaan nzhake lu tich.

<sup>7</sup> Per nawiit lu lo re kwent gox cheen re xey be, kwaan nak kwaan nawlit. Per kwaan nzhekla na nak nyera zo lu lo Dios.

<sup>8</sup> Wen nle lu zee nye gak kwerp cheen lu, per mas wenra nye nzo lu lo Dios. Kwaane non lo yizhyo ne nu noka nona lo yalnaban kwaan tira.

<sup>9</sup> Wdizh ne nak kwaan wli, nu rese xaa nzhaal gona.

<sup>10</sup> Kwaan be nu le be jwers zee nye zo be lo Dios, nel nkambaz be Dios, xaa tubka mban. Lee xaa mzaa yalnaban lo re be, nel ngwii be lo Jesucrist, nu nzhekla xaa zaa xaaya lo rese myet yizhyo.

<sup>11</sup> Kwaane nak kwaan nzhaal nabeyy lu nu kwaan nzhaal seed lu re myet.

<sup>12</sup> Nalaat lu kitno re xaa lu nixa mad lu. Wen ble rese kwaan, zee rese xaa nzho mod ne xomod wen nle lu rese kwaan: mod nzhedizh lu, mod nle lu rese kwaan, mod nkela lu sa myet lu, mod ngwii lu lo Jesucrist, nu noka modxa nambey nzo lu lo Dios.

<sup>13</sup> Tubka lab xtizh Dios lo re xaa, zaa lu rason lo xaa, nu seed lu re xaa, nu zaa lu kwent cheen Jesucrist lo xaa axta zhin na.

<sup>14</sup> Tubka ble xchiin lu kwaan mzelazh Dios lo lu, leezha mzhib re xaa gol yaa xaa yek lu nu mzaa re xaa kwent kwaan nzhé Dios lo xaa lo lu.

<sup>15</sup> Tubka ble xgab re kwaane, nu wii loya, zee rese xaa zeen nu ne xaa xomod nzha xeen lu lo xcheen Dios.

<sup>16</sup> Bkanap lu leeka lu nu wii ne xana re kwaan nseed lu re xaa, nu tubka nali le re kwaan. Chelee lu le lu re kwaane, zee lee Dios zaa yalnaban kwaan tira lo lu nu lo re xaa kenzha re kwaan yé lu.

## 5

### *Snee nzhaal le lu lo re byud*

<sup>1</sup> Nagalnot lu re xaa gol, mas wen zaa lu rason lo xaa kwaan wdizh nadoo mod xuz lu, mod wech lu bzak re xaa mad,

<sup>2</sup> nu lee re ngwnaa me gol bzak me mod xnaa lu, nu re ngwnaa mad bzak me mod bzan lu, nu nzhaal nzhul gak lu lo rese me.

<sup>3</sup> Ble yudar re byud, me nakanot sawlizh.

<sup>4</sup> Per chelee tub byud nkano xinn o xos, nzhaal rese xaa ba le yudar me yilotlaka, nel lee xaa nak

sawlizh me, nel lee me mkano re xaa yilo. Nel kwaane nak kwaan wen nu kwaan nyula Dios le xaa.

<sup>5</sup> Ngwnaa, me wlipa nak byud, nak me mlake techolalsa, nu tubka nkambaz me le Dios yudar me, nu tubka nhedizhno me Dios zhe nu yaal.

<sup>6</sup> Per chelee tub byud tubka nhzake me tich re kwaan yizhyo ne, nixa mban me per mod tub me ngut nak me.

<sup>7</sup> Kwaanzee yé lu lo re xaa Jesús zee labeyy wen xaaya, zee gak xaa tub xaa nali.

<sup>8</sup> Chelee re sawlizh byud nu re xinn me nu re xos me nankanot xaa me, nu mlaa xaa mod mwii xaa lo Jesucrist, nu nak xaa masra nakap ke stub naz xaa, kwaan nik tub welt zer wii lo Jesucrist.

<sup>9</sup> Lo yech pa nkee le re ngwnaa byud, nebse nzhaal kee le re me:

me nzhó masra chon gal liin,  
nu ngok me nali lo sa me,

<sup>10</sup> nzhaal labeyy re xaa me lo re kwaan wen kwaan  
mle me,

wen mxeen me xinn me,  
nu mzaa me garli me mlaz stub naz xaa,  
nu mzet me nii re xaa mle nambey Jesús,  
nu mle me yudar re xaa nales doo nhak,  
nu tubka mle me kwaan wen.

<sup>11</sup> Per nakeet lu le byud, me mad, lo yech cheen re byud. Nel napaka laa me kwaan nzhé me lo Jesucrist le me, leezha le me xgab ka me stub xaabyi.

<sup>12</sup> Kwaan ba nak kwaan nawent le me, nel nalet me kwaan nzhé me lo Dios le me.

<sup>13</sup> Nu noka leezha sbaasa nzo me, nzha me garli tub me nu garli stub me, nu noka nkwaan me

diizh, nu nchep me xkucher me pa nanzhaalt chep meya.

<sup>14</sup> Kwaanzee nzhekla na lee re byud, me mad, mas wen ka me stub xaabyi, nu gap me xinn me, nu wen nabeyy me garli me, zee sbaa nazaat me lugar nii nawent stub naz xaa lo be.

<sup>15</sup> Nel nzhó lak ngwnaa byud, me mlaala Jesucrist nu nzhake me tich cheen Maxuu.

<sup>16</sup> Cheleeya nzhó tub xme Jesús nzhó tub byud garli, nkin le me yudar me, zee nalet me storb lo re xaa Jesús, zee nzhó mod le xaa yudar re me wlipa techolalsa.

### *Xomod nzhaal le re xaa Jesús kwaan re xaa gol*

<sup>17</sup> Lee re xaa gol, xaa wen nabeyy lo re xaa Jesús, nzhaal wii re xaa Jesús respet lo xaa, nu masra nzhaal wii re xaa respet lo xaa, chelee xaa nzaaka xaa kwent xtizh Dios.

<sup>18</sup> Nel lee Xkyech Dios nzhé: “Nakot gu yex roo ngoon gorna yo ma yee kich nzhobxtil”. [Dt. 25:4] Nu sbaaka nzhé Xkyech Dios: “Xaa nkee zhiin nzhaal yex ka xaa”. [Lk. 10:7]

<sup>19</sup> Nagont lu re kwaan nzhekla xaa gaazh xaa tich re xaa gol, xaa nabeyy lo re xaa Jesús, cheleeya nebse nzhó tubka xaa nzhekla gaazh kwaan tich xaa gol.

<sup>20</sup> Chelee tub xaa Jesús tubka nle jwalt, nzhaal galno lu xaa delant lo rese xaa Jesús, zee noka stub naz xaa zheb, zee nalet xaaya.

<sup>21</sup> Delant lo Dios, nu delant lo Jesucrist, nu lo re mandad kwaan mleey xaa, xaal na lu zee le lu re kwaane; nu naroot lu jabor cheen tub xaa nu stub xaa, lal ble lo re xaa.

<sup>22</sup> Nu nazhibt lu yaa lu yek tub xaa sbaaya, chelee lu zer le wen lu xgab, leezha zo lu xaa gak xaa tub xaa gol, xaa nabeyy lo re xaa Jesús. Yilotlaka wen wen nzhaal labeyy lu xaa, zee ne lu xomod nak xaa, zee nayizot lu jwalt cheen xaa. Sbaa tubka nzhul zo lu lo Dios.

<sup>23</sup> Leezha ne lextoo lu nagot lu neb nis, noka gu chep xis ub.

<sup>24</sup> Lee jwalt cheen rol xaa klar doo nlu zee gaazh xaa kwaan tich xaa, per noka nzhoo zrol xaa nanlut jwalt cheen xaa nal, axta gwlu zh luuya.

<sup>25</sup> Nu sneeka, lee re kwaan wen kwaan nle xaa klar doo nlu, nu axta re kwaan wen kwaan nanlut nal, telisa zhin tub mbizh leeya yun.

## 6

<sup>1</sup> Rese xaa Jesús, xaa nak mos, nzhaal gon xaa xtizh xaa nabeyy xaa, zee naniit re myet lee Dios nawent nak, nu nii xaa nawent nak re kwaan nseed be re myet.

<sup>2</sup> Nu chelee xaa nabeyy xaa nak tub xaa Jesús, masra nzhaal gon xaa xtizh xaa nel tubka wech xaa, nel ropse xaa nak xaa Jesús. Nel lee xaa nkee zhiin lo wech xaa, nzhaal le wen xaaya, nel ropse xaa nkela Dios.

*Pab mzaa kwent cheen re maestr, xaa nyula demí*

Blu re kwaane nu bseed re xaa kwaane.

<sup>3</sup> Chelee tub xaa nlu stub naz kwaan nanakt lal kwaan re kwaan mlu Jesucrist, Xaa Nabeyy be, kwaan nle zee nye nzo be lo Dios,

<sup>4</sup> xaa zee nto doo yalxwa, nu nik tub kwaan nanet xaa, nkwaan xaa mod zee dildiizh re xaa, nu ndildiizh xaa lo rese wdizh. Nu lo re kwaane nroo

yalnzoblažh, nu nle rol xaa re myet, nu nzet xaa re kwaan nawent cheen stub xaa, nu tubka nawent nle xaa xgab cheen stub xaa.

<sup>5</sup> Tubka ndil xaa kwaan stub naz xaa nachan nzak yek nu nanlabeyyt xaa re kwaan wli. Nu nle xaa xgab lee re kwaan nali cheen Dios nak tub negos kwaan nzho mod le xaa gan demi.

<sup>6</sup> Nu wli nak kwaane, leezha nzo be nali lo Dios nzhaal le be gan gro doo kwaan, per kwaan nak xcheen Dios, zee chul gak lextoo be.

<sup>7</sup> Nel nik tub kwaan nanzenot be gorna ngol be yizhyo ne, nu sbaaka nik tub kwaan naweet be gorna yet be.

<sup>8</sup> Per chelee be nkano be kwaan gaw be nu kwaan gak be; nu chelee be nkano be kwaane, nzhaal nix doo gak lextoo be.

<sup>9</sup> Per lee xaa nzoblažh kano zyen doo demi nla xaa lo tramp, nel nkiil re xgab nachan kwaan nzho yek xaa leeka lee xaa. Kwaanzee lee re xgab ba nzhe xaa naz yat pa tira lux xaa.

<sup>10</sup> Nel lo yalnzoblažh cheen demi nak pa nzelo rese kwaan nawent. Nu nzho lak xaa nel nzoblažh doo xaa demi, zee mlaa xaa mod mwii xaa lo Jesucrist, nu sbaa mle xaa zee mted xaa bid leeka lee xaa.

### *Xaa mlib lextoo wii lo re kwaan nak cheen Dios*

<sup>11</sup> Timoteo, lu nak xinn Dios. Kwaanzee bxonn lo re kwaane. Tubka blib lextoo lu: Le kwaan nali, nu nye bzo lo Dios, nu wii lo Jesucrist, bkela re myet, nu byelal, nu nadoo gok lo re xaa.

<sup>12</sup> Mod tub xaa nye nxonn, sbaa nzhaal tubka le lu jwers nye zo lu mod ngwii lu lo Jesucrist nu sbaa le lu gan yalnaban kwaan tira cheen lu, nel axta

yilo mzaa lu kwent xomod ngwii lu lo Jesucrist delant lo re myet.

<sup>13</sup> Delant lo Dios, xaa nle mban rese kwaan nzhi yizhyo, nu delant lo Jesucrist, xaa mkeb wen lo Poncio Pilat,

<sup>14</sup> nii na lo lu nzhaal kanap wen lu kwaan mseed lu lo Dios zee nacheet xaaya, nixa nacheet luya, zee nik tub xaa nyent mod nii lee lu kale kwaan nawent. Nu bleya axta gorna bare Jesucrist, Xaa Nabeyy be.

<sup>15</sup> Nu bare xaa mer mbizh kwaan mleey Dios. Lee Dios nak xaa nzholl re xaa lo, nu tubka nak xaa rey, nu nak xaa Xaa Nabeyy lo rese rey, nu nak xaa Xaa Nabeyy lo rese xaa nabeyy,

<sup>16</sup> nu nebse lee xaa mban tira, nu nzho xaa lo tub xni kwaan nik tub myet nyent mod wii lo. Nik tub myet zer ne lo xaa nixa nik tub myet nyent mod wii lo xaa. ¡Nebse lee xaa nak xaa nzhaal kaya re wdizh wen nu tubka ndii yalnabeyy cheen xaa!  
¡See gaka!

<sup>17</sup> Bnabeyy re xaa nkano zyen doo kwaan, zee natot xaa yalxwa nixa nakelat xaa re kwaan nkano xaa, nel re kwaan nkano xaa nzho mod lux. Mas wen kela xaa re kwaan nak cheen Dios, xaa nzaa zyen doo re kwaan nkin be zee nix doo gak lextoo be.

<sup>18</sup> Bnabeyy re xaa nzhap zyen doo kwaan, zee wen le xaa re kwaan, zee gak xaa tub xaa rik lo re kwaan wen kwaan nle xaa, nu tubka liib xaa lextoo xaa zaa xaa zyen kwaan nkano xaa.

<sup>19</sup> Nu sbaa kozhaw xaa zyen doo kwaan naz leen yiba, kwaan gak mod simyent nye lo re kwaan nkambaz xaa kaya xaa yiba, zee kano xaa yalna-

ban kwaan wlipa.

*Kwaan mlaa Pab gwluzhtlaka le Timoteo*

**20** Wech Timoteo. Wen ble re kwaan mkaya lu le lu. Nankenzhat lu re kwent yizhyo ne, nixa nankenzhat lu xtizh re xaa nle mod tub xaa nhak doo, nel nik tik nagakt xaa re kwaan nii xaa.

**21** Nii na kwaane nel nzhoo rol xaa nhake tich re yalnzhak ne, nu mlaa xaa mod ngwii xaa lo Jesucrist.

Nzhekla na lee Xaa Nabeyy luu yalinkela cheen xaa lo lu.

Sbaa gaka.

Pab

**Wdizh kwaan nyaadno yalnaban  
New Testament in Zapotec, Amatlán (MX:zpo:Zapotec,  
Amatlán)**

copyright © 2009 Wycliffe Bible Translators, Inc.

Language: Zapotec, Amatlán

Translation by: Wycliffe Bible Translators, Inc.

Zapotec, Amatlán

zpo

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Amatlán

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 30 Jul 2024 from source files  
dated 29 Jan 2022

3efd442b-8972-5bb1-99a1-81f28edf99a8